

um frv. til l. um vinnuskóla á Reykhólum.

Frá meiri hluta menntamálanefndar.

Meiri hluti menntamálanefndar hefur að athuguðu máli ekki séð sér fært að mæla með samþykkt þessa frumvarps, jafnvel þótt því væri nokkuð breytt, eins og háttv. minni hl. nefndarinnar leggur til. Ástæður eru einkum þessar:

1. Fyrir þessu þingi liggja nú og eru að nokkru leyti afgreidd af háttv. neðri deild frumvörp um gagngera skipun skólamála og fræðslumála landsins. Frv. þessi eru undirbúin af milliþinganeftnd og studd, að því er virðist, af menntamálaráðherra. Má því ætla, að þau verði samþykkt eða lögð til grundvallar við skipun þessara mála, hvort sem þau verða samþykkt nú eða síðar. Það virðist því varla geta komið til mála að samþykjkja í sömu svifum frumvörp um skóla, er fara í bág við eða eru alveg utan við þetta skólakerfi og hlíta öðrum reglum.
2. Með lögum nr. 57 31. okt. 1944 er ákveðið að setja upp tilraunastöð í landbúnaði á Reykhólum. Til þess að koma þessu þarfa máli í framkvæmd vantart enn fé, og virðist naumast ástæða til að setja með lögum á stofn skóla á þessum sama stað, meðan ekki er fé veitt til þess að koma því af stað, sem þegar er ákveðið. Væri mjög æskilegt, að tilraunastöð þessari væri hrundið af stað, bæði vegna hins mikla höfuðbóls, sem nú er nálega húsalaust og í niðurlægingu, svo og vegna héraðsins, sem hér á hlut að máli. Er ekki fyrir það að synja, að tilraunastöðin gæti tekið upp nokkuð af því verkefni, sem vinnuskólanum er ætlað, ef hún fengi viðunandi húsakost og hefði Reykhóla til umráða fyrst um sinn.
3. Ef frumvarpinu verður breytt þannig, að hér verði í raun og veru um búnaðarskóla að ræða, virðist meiri hlutanum svo sem verið væri að bera í bakkafullan lækinn, því aðsókn virðist minni að þeim búnaðarskólum, sem fyrir eru, en flestum öðrum skólum, en fyrir dyrum stendur þó stofnun nýs búnaðarskóla í Skálholti. Hér er að vísu um allmikið annað fyrirkomulag að ræða en í búnaðarskólunum, og má vera, að það sé heppilegra. En sè svo að dómi þeirra, er hezt þekkja þau mál, væri nær að breyta tilhögun búnaðarskólanna, sem fyrir eru, en stofna nýjan skóla.

Meiri hlutinn leggur því til, að frv. verði afgreitt með svoselldri

RÖKSTUDDRI DAGSKRÁ:

Með því að nú er fyrir Alþingi almenn skólalöggjöf og réttara er að sjá, hvernig henni reiðir af, áður en ákveðið er um einstaka skóla, og með því að enn er ekki farið að framkvæma lög nr. 57 31. okt. 1944, um tilraunastöð í jarðrækt á Reykhólum, mælir deildin með því, að þau lög verði framkvæmd eins fljótt og unnt er, og tekur fyrir næsta mál á dagskrá.

Alþingi, 8. marz 1946.

Magnús Jónsson,
form., frsm.

Eiríkur Einarsson,
fundaskr.

H. Guðmundsson.

Ásmundur Sigurðsson.